



- SENAT -

Broj: 01-32-2101 / 12  
Sarajevo, 29. 02. 2012. godine

Na osnovu člana 167. stav 2, a u skladu sa odredbama člana 125. Pravila Univerziteta u Sarajevu i odredbama člana 117. Zakona o visokom obrazovanju („Službene novine Kantona Sarajevo“, broj: 22/10), Senat Univerziteta u Sarajevu je na 37. sjednici, od 29. 02. 2012. godine, usvojio izmjene i dopune i d o n i o prečišćeni tekst

## POSLOVNIKA o načinu dodjele počasnog zvanja profesora emeritusa

### Član 1.

Za dodjelu počasnog zvanja profesora emeritusa predlažu se posebno zaslužni penzionisani redovni profesori koji su u dužem vremenu doprinosili unapređivanju i razvoju univerzitetske nastave, naučnoistraživačkog odnosno umjetničkoistraživačkog rada i koji su stekli internacionalnu reputaciju.

Kriteriji za dodjelu zvanja profesora emeritusa su:

- duže vrijeme uspješno provedeno u nastavi, ne kraće od 10 godina, na visokoškolskoj ustanovi na kojoj je kandidat imao status uposlenika u radnom odnosu ili na drugim visokoškolskim ustanovama Univerziteta u Sarajevu;
- naučni doprinos kojim je kandidat javno afirmirao svoju naučnu oblast;
- umjetnički doprinos kojim je kandidat javno afirmirao svoju umjetničku oblast;
- izvođenje u svojstvu mentora magistara i doktora nauka u oblasti u kojoj se kandidatu dodjeljuje počasno zvanje profesora emeritusa;
- proizvođenje nasljednika u nastavi, nauci i umjetnosti, odnosno koliko je kandidat za počasno zvanje profesora emeritusa ostavio umjetničko-nastavnog podmlatka u oblasti za koju je izabran na visokoškolskoj ustanovi na kojoj je kandidat imao status uposlenika u radnom odnosu ili na drugim visokoškolskim ustanovama Univerziteta u Sarajevu;
- naučne knjige i drugi objavljeni radova značajni za naučnu oblast kandidata;
- javno predstavljeni oblici umjetničkog stvaralaštva koji su značajno doprinijeli razvoju kulture i umjetnosti.

### Član 2.

Profesor emeritus može biti angažiran:

- kao mentor pri izradi doktorskih, magistarskih i specijalističkih radova te za ocjenu i odbranu istih;
- kao član u komisijama za izbor nastavnika;
- za koordinaciju i rad u naučnoistraživačkim projektima;

- za održavanje dijela predavanja unutar predmeta u studijskim programima sva tri ciklusa studija;
- za druge aktivnosti utvrđene Pravilima Univerziteta u Sarajevu i pravilima fakulteta/akademija.

### **Član 3.**

Univerzitet u Sarajevu dodjeljuje najviše 15, a po potrebi i više, počasnih zvanja profesora emeritusa godišnje.

Zastupljenost u navedenom broju za dodjelu zvanja profesora emeritusa razmjerno se utvrđuje prema broju izabranih nastavnika u osnovnim naučnim i umjetničkim oblastima.

### **Član 4.**

Visokoškolske ustanove dužne su brinuti o tome kada pojedini njihovi zaslužni redovni profesori odlaze u penziju, pa prema tome uskladiti svoje prijedloge za dodjeljivanje zvanja profesora emeritusa.

### **Član 5.**

Ako visokoškolske ustanove u sastavu Univerziteta za dodjelu priznanja profesora emeritusa u jednoj akademskoj godini predlože više penzionisanih redovnih profesora, suprotno odredbama člana 3. stav 2. ovog poslovnika, Senat će odabrati predviđeni broj vodeći računa o ujednačenosti dodjele zvanja profesora emeritusa.

### **Član 6.**

Prijedlozi za dodjelu zvanja profesora emeritusa razmatraju se, prema zahtjevu visokoškolskih ustanova, u toku kalendarske godine, a promocija imenovanih profesora emeritusa vrši se na zajedničkoj promociji na kraju svake kalendarske godine.

Visokoškolska ustanova dostavlja Senatu, na propisanom obrascu, prijedlog svog nastavno-naučnog odnosno umjetničkog vijeća koji sadrži:

- detaljnu biografiju;
- popis radova;
- opis posebnih zasluga i kriterija utvrđenih članom 1. Poslovnika,
- saglasnost predloženog penzionisanog redovnog profesora da mu se dodijeli zvanje profesora emeritusa;
- odluke nastavno-naučnog odnosno umjetničkog vijeća još dvije članice kojima se podržava prijedlog visokoškolske ustanove – predlagača.

### **Član 7.**

Po prijemu prijedloga iz člana 6. stav 2. Poslovnika komisija Senata, koja je sastavljena od jednog predstavnika svake grupacije i resornog prorektora za nastavu, vrši ocjenu prispjelih prijedloga i njihove potpunosti i usaglašenosti sa zahtjevima iz ovog poslovnika.

Članovi komisije imaju pravo tražiti od predlagača i dodatnu dokumentaciju o kandidatu za profesora emeritusa.

#### **Član 8.**

Komisija iz člana 7. Poslovnika podnosi pisani izvještaj s ocjenom i svojim mišljenjem, koji potpisuju svi članovi komisije, Senatu na odlučivanje.

#### **Član 9.**

Svim penzionisanim rektorima Univerziteta u Sarajevu može, uz njihovu saglasnost, biti dodijeljeno zvanje profesora emeritusa, što se utvrđuje posebnom odlukom Senata.

Odredba iz prethodnog stava primjenjivat će se i na redovne članove Akademije nauka i umjetnosti Bosne i Hercegovine koji su penzionisani redovni profesori jedne od visokoškolskih ustanova Univerziteta u Sarajevu.

#### **Član 10.**

Ovaj poslovnik stupa na snagu osam dana nakon donošenja.

#### **Član 11.**

Stupanjem na snagu ovog poslovnika stavlja se van snage Poslovnik o načinu dodjele počasnog zvanja profesora emeritusa Univerziteta u Sarajevu broj: 01-I-1317/03 od 05. 11. 2003. godine.

**Rektor**

**Prof. dr. Faruk Čaklović**

